

Christian Meivah

May - June, 2015

Lhani seh thuso

Private Circulation

Mi lungtheng Joseph

Gen. 37:1-11, Joseph pa Jacob in ji li anei-e, Joseph nuno mi thum, asopi apenpi lou pasal mi som, ahi. Jacob jinu te chu engsetna le thangetna dim, ahiuvin abon chauva insung khat a chengkhom ahiuve. Jacob hi mipha, nunnem, thu tamsei lou, pasal khoh jong hilou ahi. Jacob leh Leah chanu Dinah hi nikhat Canaan numeite koma kholai alen le, Hamor chapa Shechem chun aki dei pia anasuhset ahi (Gen.34: 2). Hichu Jacob in anajan ahinla ana umthim beh tai.

Achapate chun apa-uvn ima abollou tah jeh chun alung hang un, khopi sunga pasal jouse chu ana that tauve (Gen.34:25). Jacob in agam miten ahin vetda diu ahenan, ima kihet themna ding jong aboldeh tapoi. Chujongle, achapa lenpen Reuben in apa thaikem Bilhah chu ahin kiti matpi Jacob in ajan, alung hang lneh tai (Gen.35:22). Hitia hi, achanu Dinah min asuhset jeh-a ale thuh lou, achapa ten achennau kho pia pasal jouse athauva jong ima aseilou, chule tua achapa Reuben in apa thaikem Bilhah akitimatpi jouva jong Jacob athipdel kit kidang ahi. A-in

sungah ipi soh jongle athip behbuh jengtai. Jacob hi mohphat-a pha depdop khat hinte. Achapate chun kum 17 jen chu apau Jacob (Israel) in Joseph alungset bol tum jong chu aheuve (Gen.37:3). Rachel chapa Joseph hi, kum 17 alhing tan, apa'n alungset tumhi achapa adangte anga a-im thei deh poi. Sangkhol chol bansao khat ahin khuipheh in, achapa dangho sangkhol vang chu achol ahipoi. Sangkhol chol ki-ahpeh kiti chu, na-ham tohsah lou ding tina ahi. Hijeh chun a-ute athang seuvin chu le Joseph hi avetda pan tauve (Gen. 37: 3-4).

Kum 17 bep Joseph chun aute bangin thilse agelpon, mi lungtheng ahin, apa thu thun anungin ana ahi. Nikhat Joseph in ajan-mang thu ana seido in, aute sanga achungnun johna mang ahin ahile, auten avetda cheh uvin ana johdoh tauve (Gen. 37). Ajo jonan Egypt a sepai lamkai Potiphar in Joseph chu soh din aki choh tai (Gen. 37:36). Joseph hinkho thusima kona eiho kihilna thei li aume. Hiho chu :-

1. *Malam musao ding* : Gel luhna khat inei tengle hichun eima le mi dang atongkha jin ahi. Lung hop loi

chal lou ding, kisonlel lou ding, phu lahloi lou ding, ngaikhamje kihil ding ahi. Ajeh chu adihlou ase lama gel luhna kinei khahle phaji lou ahi. Joseph chu auten athei dauva, ajoh doh-u chu khonunga ajachat nau le akisih nau ahung hi.

2. *Hinkho dih manding* : Insung ahiloule inchen hoimo lneh jongle ki tahna nei ding, lung lhahsam jeng lou ding, kinep lelna hinkho neilou ding ahi. Ilung neosah lou ding, lunglen kenga hinkho man ngai ahi. Joseph jong chu Potiphar te soh in apangin ahinla ama Pathena akitah tei tei in ahile Pathenin asumil pon, Egypt a governor gei akaisah-e. Pathen lha so lou apha.

3. *Pathenin acha ahei* : Pathenin asemsa achate amun chule ahe jinge. Ama tahsante chu akithopi tei jie. Pathen mitmua hinkho pha le adih mangte chu Pathen phatthei boh ahang tei-e. Joseph jong chu auten asuhboi-a, suhmang agot uva, ahi chu aman ahenai. Ahinla alethuh poi. Abolset nau ho chu Pathen tahsan tah in, lungmongin ana thoh jengin, Pathenin phatthei aboh lotai.

4. *Hinkho kikhelna* : Pathenin ama gingte hinkho aphaltama akhel peh thei-e. Hinkho pha neinom jou sen Pathen gin a chule tahsan ding ahi. Joseph in mihem sangin Pathen ana gingin, alungthenna chu Pathenin amun ahinlo umlou banga kimupa chu, mi thupi le thunei tah khat in akhelpeh tan ahi. Pathen tahsana gin hi hinkho malsomna ahi.

2

Pakai Jesu leh Paul

Tarsus mi Saul kitipa hin Pathen ana douve, ti iheuve. Nikhat Damascus lampia Jesun Saul hi aki mupin, ahinkho akikhel sah in ahi (Acts 9:1-19). Jesu mi ahia konin, amin jong Saul hitalouvin Paul akiti tai. Judah ten Saul atiu hi Greek le Gentile ten Paul atiu ahi. Ama hi Hebrew mi, Abraham chilhah ahi. Ama chenna Tarsus kho hi Rome te khopi khat ahi. Mose Danthu he them tah Gamaliel kitipa chun, Jerusalem hung khang doh Paul hi hou thu lama phatechaa anahil ahi.

Paul hi Rome khomi khat hinaa peng anahi. Hijeh hin Christa tahsan masaho chu ana douvin, chule Jesu mina thi masapen Stephen songa kiselihna jong chu ama thunei na noi-a soh ahi. Kum phabep jou chun leng Agrippa henga, "Kei jeng in jong, kajo chana bola Nazareth Jesu min douna thil ijakai bolding kagotsa ahi" (Acts 26:9), anati.

Saul ahilai chun, nikhat hi Jerusalem a thempu chungnung a konin Damascus a christian ho suh gentheina ding phalna ana kilah in, akondoh tai. Damascus lampia Pakai Jesun ahenga kiphonna ana nei in (Acts 9, 15), Jesun amit achot sah in, chule alung akhel jengna din anahille. Chuin Pathen thu ajan tahsan kicheh anei in, chule Pathen thu chu mihema konin ajachen thei tai (Rom. 10:10-17). Cornelius chu

Peter in Caesaria a Pathen thu ana seipeh jeh in, Gentile lah-a Christa kisan masa pen ahung hi. Chule Saul henga Ananias in Pathen thu ana seipeh jeh in, Jesu atahsan in, amit ahah kit in, Baptise jong achang tai (Acts 22:16). Saul hin mitcho puma an ngola taona man puma nithum jen Ananias ana nga ahi. Jesu mi ahi-a, kho ahinmu jouva, Jesu thu seilea pang pei-a, thohna kidang dang jong ahin thoh ahi (Acts 9:15-16).

Pakai in Paul henga nomsa tah-a Gospel na natoh ding ahitai, anati poi. Lamkai minthang tah Raja Gopalachari in hitin ana sei khai, “Christian ho hi mat (bed bugs) ho tobang ahi. Mehlih go hih un, na chu ti bolleh pung jouvinte. Donda thou le chun imu gamun tin, kinase gamunte” anati. Saul in jong christian ho suhmang agotnaa amajoh christian ahilon, asupung jon ahi. Hijeh a hi Jesu mi hijeh-a bolsetna, thohna ito leh kisih-a lung lhah ngailou ahi.

Khangdongte leh danthu

Khangdong ten danthu nit a chule nule pa jabol ding ahi (Mt. 19:16-21, Deut.5:16-20). Khang thahte koma houlimna ding Bible sim ding ho atam lhez jenge. Ajeh chu mihem khangdon lai-a achekhel leh ahinkho lhum kei-a, genthei tah-a hing ding ahi. Bible thuhil ajui leh nom asah ding, tonsot hinna anei ding ahi. Khangdong mihaopan tonsot hinna ahola, aneidoh theina dia,

Jesun ahilna veute (Mt.19:16-21).

1. *Kitepna Lui-a Moses* lekhabu nina, Deut.5:16-20 : Pathenin Moses anapeh Danthu Som (Ten Commandments) hi athupi. Deut. 5 sunga Pathen thupeh a hi, khangdong ho apatna anei masah pen ahi. Pathenin, ‘Pakai, na Pathenu ken kasei peh bangin, kapehna gam sunga damthei-a nahinkho sotna diuvin, nanu napa jabolun’ ati hi khangdong ho aseipeh ahi. Abana aseipeh chu ahile Deut. 5:19-21 sung hi khangdong hoa pat mi jouse ahilna, thupeh tia lah ding ahi.

2. *Kitepna Thah-a khangdong* mi haopa : Khangdong mihaopa hi Bible giltah-a hethem hon aumchan a kona ‘Khangdong’ tia aminvou chule kon khat in jong vaipopa tin akoi beuve. Khangdong pa hi vaipo thunei, hao jong hao-ah ahi. Ahin avaipoh thanei jong aha agouva jong lungna chim lou-a, Jesu koma tonsot hinkho adei jeh-a ipi bolleh tonsot a hingthei hia ham ti ahung doh ahi. Pakai Jesun ajah-a, ‘Tolthat hih in, mitoh jong hih in, gucha hih in, jouvin hettah sah mi hidan, nanu napa jabolin chule nang nakingailut bangin naheng nakom ngailun’ tin aseipeh tai.

3. *Mihao khangdong pa* donbutna le nangho donbutna : Loupi tah vai po le neile gou haotah khangdong pa, tonsot hinna adei jeh-a, Jesu in aseipeh chu aneova pat ahin bol peh in aseipeh. Tuni hin Jesun tonsot hin

na neina dia Mt.19:18-19 sunga aseipeh hi, khangdong vaipo mihaopa banga nabolsau hinam ? Kigel tem un ! Khangdong mihaopan Danthu a kisei ho abolsa ahi vangin, Jesun abolsa dinga aseipeh chu -

i) Anei jouse ajoh-a, asum chu vaichate apeh ding,

ii) Chuteng vana gou anei din aseipeh in ahi.

iii) Ahile tunia hiche sim jouse ki gel temun, nangma nangma sahlut nagou chu ipi hia, hichu najoh-a vaichate doptouna naman ngai-a ham ? Sopi, nangin tu tua na-itpen nagou chu, judon, jousei, jon, guh chat, kiloset, engset, thangset, chon set lung, nehluo ding neh kitiho hi mai thei ahi. Kikhoh in lang hichu nung sun loi le chun tonsot hinna toh nakhel ding ahi. Hin kemlou nadei em, kigel phan !

Hiche Deut. 5:16-20 leh Mt. 19:18-19, sunga kisei hi tha khat ahin, aseidoh banga jui ding chule inei igou, ibol theina, ithahat le ibol itoh thei jouse gou ahin, abon cha nule pa jabolna nei-a lhasam ho kithopi ding hi khangdong te kin kikhohpen ahi. (Dr. T. Lunkim)

Akisih tho Christian

“Hiche nu-a kon chun pot doh un, kamite, ajole amanu chon setna ho chang khauvin natin, ajo le ... thoh khauvin nate” (Rev. 18:1-4). Babel a kona Babylon hung soh ahin, Babylon hi Iraq gamsunga khopi khat ahi. Bible in Babylon

khopi hi thilha ho chenna, lhagao boh jouse kikhohna, chule vacha boh thet umtah ho kihenna bom asoh tai chule notinu ju tui-a leiset leng ho kham ngolna leh jonthan hoina mun asoh in, chule amanu chonsetna chun van akho khong tai, aki loupi sahna le anopsahna aval tai, tin aseipeh.

1. *Babylon khopi chim* : Vannoi leiset leng ho, ajon thanhoi piho le nop abolsa hon op chum chumin aka pi piuvun, apamai-e, apamai-e, ati uve. Chule sumkolvei ho sana leh dangka, song mantama kivei tehon jong anop sahnau lhalel in, aka-ka jengun ahi. Hiche khopi chim le ki halvam jeng thu hi, themgao thilmu (vision) danin akisei in, tulai nikhoa setna hung lung ding avetsah hinte.

2. *Babylon khopin avetsah* : Van noi leiset loupina le nopsahna, haona lalna, kilet sahna, jon than hoina, chonset ngah thei louna, sumle neile gou-a chimlouna, thilha chenna le lhagao boh khopi ahi vetsahna ahin chule notinu ati hi numei aseina ahi pon, vannoi jon than hoina hi aseina joh ahi. Tuhin veleu hen, vannoi hi *noti* (numei kijoh, prostitute) ahitai. Anumei, apasala chonset chimlou, nopsah chim theilou ahigam tauve.

India a khopi hoa jong set na thei tamtah aumtan, Babylon toh tekah thei higam tauvinte. Vannoi-a natna jatchom chom in muntin chom kah in apha thei tai. TV, Mobile, computer, internet hoa kona setna

thei adimtai. Paul in, tahsa lam lung gel thina ahi, ati (Rom.8:6). Kivon na jong hi vetset umlou, adol bep, akilom aum dan het angai-e. Malai in noti von aumin, min amuteng ama khu noti ahi, ti ahei. Tulai hin, ikivon nau le iumchanu, Pathenin hinve hen hileh ibon uva noti eihisah ngap diu hitam, lungjin aume. Numei le pasal kivonna kikhe talou abange.

3. *Sodom le Gomorrah* : Amani hi gamnom, nehputna, chule anop-a nom gam ahi. Anopval jeh in, nop sah chimthei lou adimin, chonset jon thanhoi jong val behseh ahitai. Hijeh chun Pathen in khopi teni hi meile kath in ahalvamin, tun twikhanglen (Dead Sea) noi-a aumtai. Abraham naopa chapa Lot hi Sodom a ana cheng ahi. Pathen tahsan tah ahijeh chun, Lot te insung hi Sodom ada lhah loi jou un Pathenin khopi chu mei le kath in ahalvam tai. Khopi chu adalah tengu koima akinung hei louna diuvin vantil tenin anaseipeh un, ahinla Lot jinun thu angaipon, ana kinunghei jap le chi songkhom asoh tai.

Jesun mi ahilnaa, Lot jinu chu geldoh uvin anati (Lk. 17:32). Seijui ho koma, nathu sei-u ngailou aumle thupi kitan nikhoa athoh diu chu nasa ding, Sodom le Gomorrah a chenghon anathoh-u chu oljo ding ahi, tin Jesun anasei-e (Mt. 10:15). Ohe, Chozarin le Bethsaida, ada nahi, nalah uva thil kibol chengse hi Tyre le Sidon a kibol hileh kisihi in khaodip pon kisiluntin, lunghei unte.

Thupi tan nileh nangho thoh sanga Tyre leh Sidon thoh oljo ding ahi, tin Jesun ana sei-e (Mt. 11:20-24). Noah kongalut ni gei-in, mihon ane uvin adonun, akicheng un akichen sah un, twisang alet phat in abonun achup un athi tauve. Tuhi, hiche to bang manthahna hung lhun koncha ahitai (Mt.24:38-39). Pathenin, mihem kanasem khah hi kakisihi tai, anati (Gen.6:6). Tulai ichonset nau hi Pakai Jesun hinve leh, 'Ohe, kei ma Calvary thingpel chungana kana kikhet beh chu kakisihi-e' atithei ahi.

Tulai christian hohi atahtah, Jesu dei christian lhomcha bou ahi tai. Christian kihisah tho vang atame. Jesua hinna nei, tonsot hinkem lou changsa, sohchasa themcha bou hin te. Themcha lah-a chun napang dem ahiloule atamjo lah-a chun napang dem, kikhol pha temin ! Pathen hou ho hi Lhagao le Thutah-a hou alhom lleh in, ama ama dei dei-a Pathen hou atamtai. Calvary a longlha Jesu thisan chu mohseh a manbei-a ilon mangsah diu hitam ?

Tulai Pathen thu seiphong phabep vang, Pathen lung lhaina thu seilouva, angaiho deilam lam sei, aumtai. Mi pachat dingle mi seiphath ding ngaiton thu ase un, mi alunglhai loule sum kimu ponte tinan, mi thu nei le sum neidom ho sei sei angai un, Pathen lunglam ahol man tapou ve. Jesun vang koi hile ama kingai tom henlang, niseh in athingpel kiput henlang kanung hinjui hen, atijoi.

Solchah Paul in, aphot aphot louvin jong tongin, thoh hahsa thoh in, evangelist na chu tongin, na natoh bulhit molson ati, (1) sum ngai lutna lung pohih helun (Heb. 13:5), (2) sum ngailut hi setna jouse bul ahi (1 Tim. 6:10), (3) hao ding lung poho vang lhezna thang-a ohte ding ahi (1 Tim.6:9), chule (4) Pakai in mihao van gama alut iti hah hitam, mihao van gama alut sangin heubil homa sa-ngongsao lut abajoi, ati. Vannoi nopsahna Babylon, Sodom, chule Gomorrah khopi hoa kona jamdoh loi-a, kinung hei louhel mi hitaute. Lot jinu banga kinung hei chan chu gaosap chang ding ahi. Ajamdoh thei jouse Pathenin phat thei boh hen. *(Rev. Seikholen)*

Changlhah semnu

Nupi khat in jingkal seh in a-insung mite neh ding changlhah (chapati, roti) ana semin, chule khat aseme jin, hichu agikkel khat touvin akilahna din kotbeng polama thelna chungana akoi jin ahi. Tehsepu mi vai chapa khat in jingkal seh in ana kilah jin, amanu pachatji sangin, 'ase na bol leh nachunga chuding, apha na bol leh na henga hung kile ding' atijin changlhah chu ana kilah jie.

Ama pahcha louhela, 'ase nabol leh nachunga chuding, apha nabol leh nahenga hung kile ding' tia ase jing chu angai chimtan, hichepa hi ahungdana ding kibol hen tin, ni khat ama neh ding changlhah a chun

thina ding gu ana koi tai. Hiche changlhah chu kotbenga akoi got laitah in, akhut ana kithing in, akicha behseh in changlhah chu mei-ah ana sep lut jotan, athah asemin kotbenga ana koitai. Nidanga bangin, khutdo pa chu ahungin changlhah chu aki lah in, 'ase nabol le nachunga chu ding, apha nabol leh nahenga hung kile ding' atin achemang tai.

Nupi nu hin jingkal seh-a changlhah asem phat leh achapa natoh pha hola khola chedohpa ana gel doh jin, damsela ahung kilena din ana tao jie. Ajeh chu akhut tah-a changlhah asem chu nekhaji leh tichu angaichat ahi. Changlhah athah asema khutdo pan anakilah kit, ni lhah chun amanu kot chu ana kikiu in, ahon leh achapa chu anahi. Acha pa chu agong in, chule anu henga, 'kidang tah-a in kahung lhun thei ahi. Lampia kagil kel behseh-a, kakoma khutdopa khat henga nehthei kaki thumleh aman changlhah pheng khat eipen, hiche hi niseh-a kaneh chu ahin, kei sanga nagil keljoh jeh in tunin nangin netan' ati, tin anu koma ana sei-e.

Hiche ajah chun anu chu amai moldeh jenge. Changlhah-a thina gu analah chu agel doh tan aki ngaise lele tai. Thina gu alhah khum changlhah chu khutdopan ana kilah ngei ngeileh achapa akitha ding chu ana tijatpi tai. Hijeh chun, khutdopa thusei, 'ase nabol leh nachunga chuding, apha nabol leh nahenga hung kile ding' kiti chu ipi seinah ahi

ahecten tan ahi. Thilpha ibol teng Pathenin ahei, mi seiphat ding nga nga ngailou ahi, ti thu hichea konin akihe chene. Pathenin thilpha ibol nom sah jing uve.

Hou natongpa jinu

Missionary, evangelist, hou natong adang ho jinu, i-tiu le ide um, veute. Thuchih 18:22 “Pasal in jinu akimu teng nunnoma ahitan, hijeh chun Pakai-a konin jong lunglhaina akimui.” Jinu kimu pasal chun thilpha akimu ahi, tin jong aseie. Jinu chun Pathen mina insung ahin sem tengleh ajipa kipana ahin chule Pathen lunglhaina jong ahi. Hou natong mi khat toh dingle thohding atama tam ahijie. Mun nomlou tah tah-a pansauva, vaicha tah-a hing uva, migenthei mivaicha ho khohsah a, kenglama hacheuva, mipa mise jong akito pijiu ahi.

Hijeh hin, alung gela chang lhatna nei-a jong atame. Amaho hi ajinun atilkhon jing louva ahile lhep nan ajothei-u ahi. Ajipa min aseiset a, a-engbola, ataitom tengle ajinun aphu lah ding ati louhel ding, thilse bol ho chu ngaidama ataopeh joh jiding ahi. Jinu chu Pathena hat ahi louleh nen jouna tha anei lou ding, alung sunga satanin mun aloa ajipa lhepnaa achuh sah thei ahi. Jinu hi jong hou natong khat dana akigel jing angai-e. Numeite thumop them, jindot them, thase lou, kamvang mi, hangsan mi, lhagao lama mi hil thei

7 le pui thei hihen. Bible thu jong aha het angai-in, hijeh chun Bible phaten sim jing hen. Ajipa ina um manlou ahi jeh-a, achate jouse mi ahi dohna dia houthu le leiset thua anun apui jing angai-e. Chate mi asoloule anu le apa mopohna ahi. Ps. 127 in chate hi Pathen thilpeh ahi, ati. Pathen in anei ching dinga cha apeh-a anu le apa anganse ahi. Pathen cha chu Pathen dia Pathen dei-a chintup peh angai-e.

Polama kona suhset dia ngah jing satan chun hou natongte insung chu, itihle kalut in kasu cha vai dem, tia velhi jing ahi chu suhmil lou ding ahi. Jinu hi Pathen toh aki lhon khom jing angai in, hichena dia chu Bible asim jinga chang taonaa jong ahat ngai ahi. Jipa taopeh hat jinu ngaichat ahi. Pathen na atohnaa ajipa akisuh jingna dia ataopeh jing loule aseikhel umthei, mi aphindoh thei, gal akihol doh thei ahi. Pastor pa jinu, hou natongpa jinu chu phun se, kamtam, kinahpi ding hol gunset, ajipa jalou, mijalah-a ajipa toh kina ngam hi hih hen. Hou natongpa ajabol leh Pathen jong ajabol ahidan kihet hen. Chuti leh malsomna amanu insunga um ding ahi.

Tulai hin, Pathen tahsana hat jinu akingaichai. Ajeh chu hou na tohna atamjoa numei kin aumtei jie. Numei toh ding chu numei maman atohle akisuh in ahi. Nungah ahiloule numei hon inchen leh hou thua doh nom anei teng ule numei kom joh-ajahcha louvin aseie ngamjo jiuve.

Lhaanmola nikh khat

Office a alenloi khat doctor koma achen, “Niseh-a ina toh ding tampi pi kakipoh jile ka chol val jeng tai. Apatna ding neihil in” atileh doctor pa chun, “Hapta khat seh leh nikho keh khat nilhah lam suti kilah jin lang, hiteng chule lhan mola chen lang, lhansong ho simin vah le len, nilhah kothim konin na ina kilen” tin ana sei-e.

Idia nikho kehkhath lhanmol a kagaman khoh ding ham, tia ale doh kit leh doctor pan, “Hikoma atonsot a dia kivui ho chu navet lele ding kadei in, amaho mi atamjo chun, tua nangma gel banga, “Ken kabol loule abol ding dang aumpoi” tia gelloi ahiuvin, amaho thi nunga jong vannoi leiset ahina banga um jing ahidan, geltoh kop-a navet lele ding kadei ahi” tin ana donbut-e.

Hitia ahilna chu lunglut tah in agelin, kho ahin hen, chunia kon in amachang bou natong dana aki ngaito chu akhel in, midang jong anganse jijin, ama jong a-olin, chule akin jong ache bep in achejom jing tai.

Galjona lampi

“Christa hinkhoa galjona eikijot khompi jinguva, keiho mang chaa Christa hetdohna le phondoh na chu muntina gim namtui banga eithe chan soh uva, Pathen thang vah in um jinghen” (2 Cor. 2:14).

8

Gollhang khat hi Pastor pu henga achen, “Lamkai pu, thoh hatna ka neina din, neitao peh in” anati. Chuin Pastor pu chun ama din taona hitin ana mange, “Vo Pathen, hia kanao pa hi jingkal in, sunin, chule nilhah in, boina hahsatna tampi pi pen” ati bep leh gollhangpa chun, “Lamkai pu chuti chun taohih in, kaboi louna ding joh in neitao peh in” atin, atao lhon chu asutang doh tai.

Pastor pun gollhangpa kom a, “Boina hahsatna nanei leh thoh hatna nanei ding ahi. Gal kihatna napan leh pachanna galjona ipi ham ti nahet ding ahi. Gentheina neilou ten galjona aneipoi. Thoh hahsatna muna Jesu toh napan khomleh aman naki thopia galjona napeh ding ahi. Leiset hinkhoa hi boina hahsatna toh tei dia nakigin jing angai-e. Thing pela kikhai sangsa hon bou kikhai sang Jesu toh iti kivop ding ham tichu aheuve. Calvary jeh-a Jesun pachan na galjona ananei ahi. Cross kiput je akihat leh pachanna galjona kinei ahi jie. Thoh hatna nadei leh genthei hahsatna nathoh masat angai-e” ati peh in ahi.

Miho leh gam ho

Galilee : Palestine hi Jesu khang lai chun thumin ana kihomin, Judea, Samaria, chule Galilee ahi. Galilee hi chunglama ana ume. Vapama kon in kilometer 40 vel gam aloi. Galilee hi achunglam sea mol aumin, anoilam se vang acham jep-e.

Galilee leiset hi aphan, twi jong aneng in, vadung jong alongin, chule olive thingphung jong tampi apou ve. Tulai-a Israel le Lebanon gam gi hi Galilee sahlam panga aume.

Olive mol : Jerusalem khopi solam a aumin, Bethany leh Jericho jotna lampi pama um ahi. Olive mol hi sunu song (lime stone) atamjo ahin, kilometer khat le akeh vel sao mol ahi. Anoilama Gethsemane hon aume. Olive phung atam jeh-a Olive mol kiti ahi. Jesu le asej juiten hiche mol noilam hi ahopa jingun, Bethany a anache jiuve. Hiche mola kon hin Jesu ahingun vana lahtouvin ana ume. Olive mol vuma Judahte cemetery aume. Messiah ahung kit tengle hiche mola dinginte, tihi Judate tahsan ahi (Zech. 14:4).

Mary Magdalene : Galilee dillen lhumlama um Magdala kiti khopia hichenu hi cheng ahi. Amanu hi New Testament a Mary adangho sanga akihet theina dia Magadala a cheng Mary, ti-chu Mary Magdalene kiti ahi. Amanu hi itobang miham aki hepoi, ahinla Jesun amaa kona thilha sagi anodoh ahi, ti bou kihea ahi (Lk. 8:2).

Jesun adamsah jeh in, aja bolin, chule anung jui in ana pange. Amanu hi Zebedee jinu le Jesu nu toh kingai tah anahi. Amanu hin cross a Jesu kikhai pet amun chule Jesu lhana kona athodoh jong ana he masa pene. Jesun thinaa kona athodoh-a akimupi masat pen nu

jong anahi. Hiche jou kalse hin ama nu akimin phah kit tapoi.

Zebedee : Pakai ngailut seijui John pa ahin, ngaman mi ahi. John upa Jacob hi Jesu seijui lah-a amasapen ahin, chule martyr masapen jong ahi (Acts 12:2). Zebedee chenna mun hi Bethsaida kom, Galilee Dillen pang ahi. Zebedee hi ngaman mi ahi vanga chuti vaichat lou ahi, aman ngaman dia midang jong agoi ji ahi (Mk. 1:20). Bible a mun khat bouva akimin phah in, hichu ama leh John chule Jacob kong sunga touva, len asemphat-u bou chu akimin phahna mun ahi.

Zebedee jinu Salome hi, Jacob le John nu ahi (Mt. 27:56, Mk. 15:40). Hiche Salome hi Herodias chanu chu ahipoi). Jesu nu Mary hileh Zebedee jinu hi thisan lama kinaina nei hidia tahsan ahi. Amanu hin achapa teni chu Jesu jet lam leh veilama tousah dia ana dei ahi (Mt. 20). Chule amanu hi Jesu cross a kikhai pet in akoma ana um in, chule Jesu lhan gohkeu mu masa lah-a jong apange. Jacob le John hinkho mandan akivet leh anulhon hi Pathen mitah khat anahinte tihi akisei ngame.

Barabbas : Ama chung changhi aki hahet poi. Mithat, gucha, thunei vai homte jabollou, Rome leh Judahte daan sukehpa ahi bou akihei. Ama hi mipi kiphin jeh le gam vaipo mei san jeh-a vangphat lopa chu ahi. Barabbas thing cross a kikhai ding pa, khelin Jesu ana kikhai jon ahi.

Nui tadiute

* *Golcha ni kihouna* :-

Tonglen : Manga idia naha umlou ?

Manga : Kanui khel jeh ahi.

Tonglen : Nui seh in, itia naha asuh bella ham, najou nasei hinte.

Manga : Ajeh chu Sumo Wrestler kanui sat jeh ahi.

* Mipa khat in cha 6 anei in, acha tamnei jeh chun akipah in, ajinu chu amanun ajahda vangin, “Cha gup neinu” tin akoujin ahi.

Kikhopna khat-a nilhah khat ana pang lhonin, kothim phat chun ina akilenom tan, ajinu henga, “Cheta hite, cha gup neinu” anati. Ajinu’n aminvona chu ajachat pin chule akhop in, mipi lah-a chun oging tah in ahung pengjah jengin, “Henge, henge, cha li neipa” ahinti leh akipat doh lhonin in ajon lhon tai. In alhun phat lhonin cha 4 kiti chule cha 6 kiti chu ipi tina ham, tina ah akijan nah lo lhon tai.

* *Tongsei* : Nisa leh lha lah-a hoi joh hi kiphat chompim ?

Lamsi : Lha akiphat chompi joi.

Tongsei : Ajeh ipi ham ?

Lamsi : Jan kothim teng lha avah in, ahinla nisa hi sun khovah pet, nisa akingaichat lou pet in avah-e.

* Nupa tenin ju adon khom lhonin, jipa chun, “I love you” anatin ahile ajinun, “Nathusei chu nangma lung thima kon hei, najuhai chun asej hei mo ?” atile, amapan juhah chu aven “I love you” anatin ahi.

* Ojapin school chapang nu henga “Napan ipi abolji em ?” atile ama nun, “Kanun asej sei aboljie” ati.

* Kikhopna khat-a nupa teni ana pang lhonin, aloi khat in, “Nachapa lhon chu lekha athem lhez-e” ahinti leh jipa chun, “Ajeh chu aman kei lhoh (brain) akilah ahi” anati. Ajinu chun ajanom pon, “Dih-a chu, dih a chu, keilhoh vang kei luchanga aum nalai bouve” anati.

* Pastor khat in, Sunday nia hou ina thu asej jouvin, mipi henga, “Tu map kit le jousej phat lou dan kasej ding ahi, nabon chauvin Mark bung 17 hinsim cheh un” anati.

Map kit nikho chun, athupi seipat masangin, “Koi koi in Mark bung 17 nahin sim um, lungset tah in asim sesen nakhut hindom un” ati le mi akeh valin akhut ana tung ui. Chuphat in aman, “Ka kipah-e, khut tung ho chungah, ajeh chu Mark lekhabu hi bung 16 bou ahin, kasej ding toh nakitoh ui” anati.

* Houbung khat hin, Good Friday nia thupi sei din khola konin Pastor khat ana kouvun, ama chu thu agom goma seije helou khat ahin athusej ngaiho chu aning kitel gamui. Mipi jahnom thu ahinsei doh seh le mi hon. “Amen” tin asam jiuvin, ahinla pasal khat chun “Amen, Pharaoh” ahinti jing kei in ahi. Kikhop kichai in, thuseipa chun amapa chu akimu pin, “Idia, Amen khela, Amen Pharaoh’ nati ji ham” tia adohle aman, “Pharaoh, kamite sol tan” katina ahi anati (Deut. 8:1).

Het dia Phachom

* *Nikho loupi ho :*

- Mother's Day ... May 10
- Pentecost Sunday ... May 24
- Father's Day ... June 21
- World sunday school day .. Nov. 1 & Kut.

* Guwahati khopia *Kuki Worship Service, Sunday* nikho kaikhomna phat akikhel tai. Jinkah pung 11 a ana kikai chu, March, 2015 a konin sun pung khat (1 p.m.) in aki kai pan tai.

* Electric Plane khat France ten asemun, vana minit 10 alensah ui. Ginglou, petrol ngailou ahin, kho nung dia phalheh din aheuve.

* Thusim lui dung jui in 'Hanging Garden of Babylon' tia kihe hon hi leng Nebuchadnezzar -II in anasem in akihei.

* India te lousem 'Ayurvedic' louho hi China te lou kitem pat masanga ana umsa ahitai. Ayurveda kiti chu 'science of life' tina ahin, hiche lou hi kum 6000 aupa tai.

* U K a mi ni-in, *bottle* jat khat asemdoh lhonin, hiche hai (bottle) hi asunga thil imanchai tengle pai mang sanga nehdoh joh ding ahi.

* Tulai hin tohmun a-onge, tia thu soa so-a, eiho lam nungah ho lhem lha atam tai. Tolop tampi pi muna ahisah un, advance sum jong alajiu vin, 'appointment letter' jong ape jiuvin, atong dia khopi len hoa ache tengu, numei kijohna pou anahi jin,

ahiloule a officeumlou ho ahijin, sum holna anei-u ahinome. Hitiho nato tengule phaten kholtoh masauvin.

* Bhubaneswar student nin, keng koh jat khat asemdoh lhonin, hichu ikibua Km. khat ivale leh Mobile battery charge abol jitai. Laptop bang charge bol ding ahile Km. khat val che angai-e.

* America ten Car lhahi-a hat jat khat asem un, hichun pung khat a Km. 400 vel ajotchai ding ahi.

* America te NASA in van chungu planet, eiho chenna leiset tobang adang 715 jong, nisa umna kalchung peh-a, amudoh tauve.

* Van chungu atahsa tah-a galeng Marsha S. Ivins, kitinu (America astronaut), van chungu ni 55 ana cheng nu chu Guwahati a ahungin, student ho henga hitin ana sei-e :

Space ah tui ahah lheh in, jun aki thah joule hichu kisu thenga ki don kit ahi. Gravitation beina mun ahi jeh-in sam jong akitung jang jengin, miho jong gih ta louva kilap lele jiu ahi. Space polama nisa lah-a akipot leh tah sa temperature 100 degree Celsius ahin, jana akivadoh le adap dan chu minus 150 degree Celsius ahi. Mihem gu jong anem (atah lou) jep-e.

* Mumbai, Gujarat, Kolkata hoa cheng Parsis ho hi alhom tul tul jeng un, mi 60,000 vel bep ahi tauvin, hi jeh hin gov't in amaho jat hi apunbe nadiu pan alatauve.

Christian Meivah - sim ho taona akiman peh jinge. Kum sumto Rs. 100/- ahin, asim nom jousen hin peuvin, sum napeh lhaa kona kum nakisim peh ding ahi. M.O. hin thot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Nagaland a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpr.
- 7) Rev. Seikholen, Medziphema, Nagld.
- 8) Mr. Seikholon Singsit, Kohima.

Hetsah nom ho

* Vannoi leiset a Airport lenpen, hi King Khalid International Airport ahin, hiche hi Saudi Arabia gama Riyadh a aume.

* Radio Frequency Radiation in hui asuhboh jeh in, cell phone Tower hi hospital, school, chule chenna mun hoa umsa lou aphai ajeh chu WHO in Mobile Tower hoa kona Radiation hin Cancer akon sah thei din aseie.

* Akija danin, Delhi tolpi *fake call centre* 50 vel um tante, tihi ahi. Hiho chun tohmun hoitah tah aume atiuva, advance sum mi khat a 10,000-25,000 alah jiuva, sum pesa ho natong dia ache jiule hol mo jiu, asumu mang gam tamtah aumtai. Kichih thei un.

Christian Meivah
May - June, 2015

PRINTED MATTER

To :

Editor :
Rev. M. Haokhothong,
C/o, Tingjanem Manchong
Nichols High School, Satribari, K.C. Road,
P. O. Rehabori-781008, Guwahati, Assam.